

Kvar poemoj sen iliaj melodioj

AMOSONGÔ

Per mia mano,
Por amoplano,
Ĉe florabundo
De verda grundo
Mi nun konstruas
Kaj plene ĝuas
Kabanon klaran
Kaj solidaran:
La gastolerta,
Aperta pordo
Por la orkestro
De birdohordo,
Kaj la fenestro
Montranta vojon
Unuan fojon
De ŝi tretotan!

Por ŝia ven' la teron krute kotan
Mi faris nun facila kaj ĝardena
Ĉe freŝa hor' de juna sun' matena:
Ho Deino, via sino
Per la ŝpino de l' destino
Tuj prenu min!
Ho buŝotuŝo,
rozodora gusto
De matura frukto: ŝi!
Ho amo mia,
kaj pasia,
Kaj ebria
nur pri ŝi!

La teron krute kotan nur por ŝia ven'
Mi faris nun la bedo de ĝarden'
Ĉe freŝa sun' de la maten'.
El densa for' mi vidas ŝin aperi,
Kaj mia kor' kuraĝas plu esperi:
Atendas min nun amo vivosolva!
Mi trompas min: ne ŝi, nur blovo solva...

Ho pensu nur: la domo tute pretas,
Kaj via vir' pri via ven' poetas!
Ho pensu nur: la domo tute pretas,
Kaj via vir' solecas kaj vegetas!...

AMOTROVO

Mi trovis ŝin sur strato
Kaj sekvis ŝin per gvato
Okul':
Mi pensis tuj pri revo,
Pri dono kaj ricevo,
Pri lul'!...
Mi pensis tuj pri devo,
Pri dono kaj ricevo,
Pri lul'!...

Kaj preter la gracia
Mi hastis, sed sen ia
Kalkul'
Ektuŝi sin hazardis
Kaj ŝi al mi petardis:
Krudul'!
Ektuŝi sin hazardis
Kaj ŝi al mi bombardis:
Krudul'!

Kaj tio nin instigis
Ĝis vera sin estigis
Simul':
Nin prenis sento bola
Kaj amo estis sola
Postul'!...
Nin prenis sento vola
Kaj amo estis sola
Postul'!...

Kaj post monata kvanto
Nin vekas per plorkanto
Etul'!
Ni pensis tuj pri devo,
Pri dono kaj ricevo,
Pri lul'!...
Ni pensis tuj pri revo,
Pri dono kaj ricevo,
Pri lul'!...

EKSTAZO

Ŝi tiel bele sin vestas
Per songo kaj mar',
Ke ŝia korpo sugestas
Pri tuŝo kaj flar'!...

Ŝi estas nun papilio
Sub klara vual',
Kovrita per la magio
De roza petal'.

Se ŝin ni tuŝos leĝere

Per fingro de man',
Ŝi disŝaŭmiĝos mistere
En blovon de van'!...

DOLĈA ILUZIO

Ripoze restas
la papili' sur floro:
nun, kiu estas
el ili papilio,
kaj kiu – florfolio?